

## Kapítulo 3

# EVALUASHON DI HISTORIA MORMON

Mas parti kapítulo dos ta e storia ku Iglesia di Hesukristo di e Santunan di e Deláster Dianan ke pa nos tende. Ma e historia aki tin problema serio ku nos lo analisá awor.

### I. PROBLEMA KU HOSE SU BUSKAMENTU DI TESORO

Iglesia mormon ke duna impreshon ku José Smith tabata un hòmber santu. Ma tin hopi evidensia ku ta kontradisí esei. E relato kon Smith a deskubrí e plachinan di oro for di kua el a tradusí e *Buki di Mormon* ta un ehèmpel. Ta un echu ku tata di José Smith a okupá su mes ku buskamentu di tesoro derá, i asta a purba traha plaka falsu.

Mormonnan no ke atmití ku José Smith i su rumannan a sigui e mésun pasonan di nan tata. E tambe a purba lokalísá tesoro skondí dor di hasi uso di un piedra "mágiko" koló di chukulati den forma di un webu ku el a haña ora el a koba pos pa Clark Chase serka di Palmyra.<sup>1</sup>

Smith a gaña hende ku e por mira unda por lokalísá tesoro derá òf algu perdí dor di pone e piedra "mágiko" den su sombré i tapa su kara ku e sombré di tal forma ku ningun klaridat por drenta. Den skuridat e piedra supuestamente a bira transparente i Smith por a "mira" unda por lokalísá e obheto deseá. José a kobra pa su "servisio". Ora nan no a lokalísá e tesoro unda Smith a indiká, el a gaña e persona un òf otro kos pa e sigui ku e búskeda (i pa e por sigui kobra pa su engaño).

Añanan despues José Smith a desmentí ku el a mete den e ofishi baho aki. Ma e echu ta bon dokumentá. Entre otro Peter G. Bridgman a trese un kaso kontra Smith, akusando e di usa engaño pa haña plaka i Smith a ser arestá.<sup>2</sup> Bisiñanan a konosé José Smith komo un gañadó formal ku ta gusta eksagerá.

### II. PROBLEMA KU RECHASO DI DOKTRINA BIBLIKO

Segun José Smith dos persona divino a aparesé n'e i a bis'é ku tur religion ta kiboká i ku "tur nan kredunan ta un abominashon den su bista." Si esei ta bèrdat, anto nos mester yega na konklushon ku tur kredo bíbliko ta falsedat. E ora ei ta mentira ku Beibel ta Palabra di Dios, Hesus no ta Dios, salbashon no ta pa medio di fe den e obra kumplí di Hesus, Kristo lo no regresá, ni shelu ni fièrnu ta eksistí. Si e vishon ta e bèrdat, doktrina bíbliko ta puru mentira.

Ademas, Deuteronomio 18:9-13 ta yama adivinashon i montamentu "abominabel"—nèt loke Smith i su famia a praktiká pa haña tesoro skondí. Ta sumamente raro ku Dios a kondená kredunan bíbliko komo "abominabel" i ignorá Smith su práktikanan ku Beibel mes ta yama "abominabel."

Beibel ta kita tur duda ku doktrina mormon, supuestamente tresé na tera pa sernan selestial di splendor, no a originá ku Dios. Galationan 1:8-9 ta splika kla: "Ma maske nos, òf un ángel for di shelu, lo a prediká na boso un evangelio kontrario na esun ku nos a prediká na

boso, ku é sea maldishoná ...mi ta bolbe bisa awor: si kualkier hende prediká na boso un evangelio kontrario na esun ku boso a risibí, ku é sea maldishoná."

E siguidó di Kristo nunca mester bandoná Skritura apesar di kuantu ángel e por a mira. I kòrda tambe ku no tur ser selestial di splendor ta di Dios pasobra "...Satanás mes ta desfrasá su mes komo un ángel di lus" (II Korintionan 11:14).

### III. PROBLEMA KU TARDANSA PA PUBLIKA E VISHON

Segun e relato ofisial di e Iglesia di Hesukristo di e Santunan di e Deláster Dianan, tabata na aña 1820 ku Hosé Smith a mira un ser divino mustra dede riba un otro bisando "Esaki ta mi Yu stimá. Tend'é!" Ma e relato aki ta problemátiko.

E problema ta ku nan no a publiká e relato aki te 1842. Ta inkreibel ku Smith lo a warda 22 aña pa konta mundu di un di e eventonan mas spektakular den historia—e promé biaha den historia ku Dios Tata i Dios Yu a presentá na e mésun tempu komo dos persona distinto! Un sekreto di 22 aña? Pero e problema ta mas serio. Historiadó asistente di Iglesia mormon, James B. Allen, a atmití ku durante e dékada di 1830

"...e miembresia general di iglesia tabata sa poko, òf nada di esei (e promé vishon).

...ningun di e skirbimentunan ku nos tin aktualmente tokante Hosé Smith ku a wòrdu skirbí durante (dékada) 1830, ningun di e publikashonnan di Iglesia di e dékada ei, i ningun relato òf korespondensia di e periodo ei ku a wòrdu deskubrí, ta mensioná e storia di e promé vishon ..."3

E evidencia ta mustra basta kla ku e storia di e promé vishon tabata un fábula inventá hopi aña despues di 1820.

### IV. PROBLEMA DI MIRA DIOS SIN TA UN SASERDOTE

Doktrina mormon mes ta duna evidencia ku Hosé Smith no por a mira Dios. Na sèptèmber 1832, Smith a haña un revelashon ku un persona ku no ta un saserdote "no por mira kara di Dios, i keda na bida."<sup>4</sup> Si e revelashon ta bèrdat, Smith no por a mira Dios nuebe aña promé ku el a bira saserdote. Di otro banda, e revelashon ta mentira si Hosé Smith a mira Dios ora e no tabata saserdote. Tur dos no por ta igualmente bèrdat.

### V. PROBLEMA DI DIFERENTE RELATO DI PROMÉ VISHON

E storia di Hosé Smith su promé vishon ta hunga un ròl sumamente importante den mormonismo. James B. Allen, historidó asistente di e iglesia mormon a deklará ku "kreensia den e vishon ta un di e fundamentonan ku miembronan fiel mester aseptá. Solamente kreensia den e divinidat di Hesus di Nazarèt ta mas importante. E storia ta un parti esensial di e promé lès ku mishoneronan mormon ta duna potensial kombertidónan, i ta eksigí pa aseptá (e storia) promé ku por boutisá."<sup>5</sup> E doktrinanan mormon di politeismo, e kreensia ku Dios i Kristo ta dos persona físiko distinto, i e siñansa ku Dios Tata ta un hende eksaltá, ta basá riba e vishon aki.

Nos a nota ku Hosé Smith su supuesto vishon di Dios a keda sekreto pa 20 aña. Na aña 1965 a kuminsá sali na kla ku iglesia mormon tabata skonde diferente dokumento bieu di e vishon pa motibu ku nan no a kuadra ku e relato ofisial.

Lógikamente e dokumentu mas antiguo, esun skirbí pa Smith mes na añanan 1831-32, lo mester ta esun mas konfiabel. Pero si mormonnan aseptá e dokumentu aki komo e relato ofisial, nan lo perhudiká vários di nan doktrinanan prinsipal. E siguiente skema ta klariá algun diferensia den e relatonan.

Dokumento	Hosé su edat	Personanan ku a Aparesé	
		Kuantu	Identidat
Relato ofisial	15	2	Dios Tata i Dios Yu
Relato di Hose Smith (1831-32)	16	1	“Señor” ku a bisa “mi a wòrdu krusifiká” (pues e persona ta Hesus)
Relato di Warren Parrish (1835-36)	14	2 + hopi	* 2 persona deskonosí; un a bisa “Hesus ta e Yu di Dios”, pues E ta ni Tata ni Yu * hopi angel

Pero un problema mas serio ta ku tin asina tantu kontradikshon den e relatonan (diferensianan ku nos no a studia aki) ku ta lógiko pa puntra si di bèrdat Smith a haña e vishon mes. E diferente vershonnan ta lamta sospecho ku e storia di e vishon a wòrdu inbentá i floriá gradualmente pa lídernan mormon, te porfin nan a yega na un relato aseptabel.

## VI. PROBLEMA KU HOSE A DJOIN E METHODISTANAN

Den Smith su vishon na aña 1820 Dios Tata i Dios Yu a bis'é ku "tur kredu ta un abominashon den Su bista" i dos biaha a tah'é di djòin un iglesia. Pero na aña 1828—despues di e prohibishon, despues di tantu bishita di ángel, despues di haña i kuminsá tradusí e plachinan di oro—Hosé Smith a bira miembro di iglesia Metodista na Harmony, Pennsylvania.<sup>6</sup>

Joseph i Hiel Lewis, primnan di kasá di Hosé Smith, a konta kon nan a reakshoná ora nan a haña sa. E kos a molestiá nan i nan a konsultá ku un predikador.

"Nan a haña ku tabata un bèrgwensa pa tin den iglesia un persona ku ta konsultá ku mortonan, òf ku ta praktiká magia... P'esei, djadumingu nos a bai na kas di tata, unda e reunion mester a tuma lugá e dia ei, i a yega na tempu pa mira Smith i papia ku né pa basta un ratu den magasin di tata promé ku e reunion.

Nos a bis'é ku su trabou, hábitonan i karáker moral no a kuadra ku e disiplina (kristian), ku su nòmber lo ta un bèrgwensa pa iglesia, ku mester tin arepentimentu, konfeshon i sikiera un promesa di kambio—ku e dia ei mes e por pidi pa kita su nòmber for di lista di miembresia, òf lo mester hasi un investigashon di dje.

El a skohe e promé opshon, i e dia ei mes a pidi pa kita su nòmber for di lista di miembresia."<sup>7</sup>

Nos por yega na un di dos konklushon: 1) òf Hosé Smith tabata desobedesido na Dios dor di bira miembro di iglesia Metodista i pues no por ta un profeta, òf 2) Smith nunca a haña e promé vishon, i el a inventá e storia.

## VII. PROBLEMA KU HOSE A MURI KOMO MARTIR

Hopi mormon ta kere ku Hosé Smith a muri komo un mártir inosente. Ta bèrdat ku su morto tabata inhustu debí ku nan a asesin'é sin husga'é i proba su kulpabilidad òf inosensia. Ma e impreshon ku *Doktrina i Aliansanan* ta duna no ta kuadra ku realidat:

"Pa sea tètimonio di e buki aki i e Buki di Mormon, nos ta anunsiá ku Hosé Smith e Profeta, i Hyrum Smith e Patriarko a muri komo mártir. Nan a tira nan den prison di Carthage, dia 27 di yüni, 1844, mas òf ménos sink'or di atardi, pa un multitut armá—disfrasá na pretu—di 150 pa 200 persona.

Bala a kohe Hyrum promé i el a kai kalmu, bisándo: Mi ta un hòmber morto! Hosé a bula for di bentana, i nan a tir'é mata bisando: 'O Señor mi Dios'! Nan a tira tur dos despues di nan morto, na un manera salvage ...Ora Hosé a bai Carthage pa entregá su mes pa e rekisitonan pretendé di lei, dos òf tres dia promé ku su asesinato, el a bisa: 'Mi ta bai manera un lamchi pa matansa; pero mi ta kalmu...mi konsenshi ta limpi pa ku Dios, i pa ku tur hende. Lo mi muri inosente...'" (135:1,4)

Ma Smith a muri manera un lamchi inosente? John Taylor, ku tabata será ku Smith i Hyrum i a keda heridá den e tiroteo, a kontá ku ora Hosé Smith a tende e hòmbernan armá ta bin, Smith

"...a bai na porta, a saka e revòlver di seis bala for di su saku ku Hermano Whellock a laga, a habri porta un tiki, i a tira seis baha tras di otro; solamente tres di e balanan a tira. Despues mi a komprendé ku dos òf tres a keda heridá pa e tiroteo aki, i mi ta informá ku dos a muri."<sup>8</sup>

Ta klaro ku Hosé Smith no a muri kalmo i pasivo manera un lamchi inosente.



- 
- 1
  - 2
  - 3
  - 4
  - 5
  - 6
  - 7
  - 8